




XUNTA ELECTORAL DE GALICIA



Destinatario: D.^a Paula Prado del Río, representante xeral do Partido Popular.

Asunto: Acordo da Xunta Electoral de Galicia, do 6 de marzo de 2020, polo que se resolve a denuncia da representante xeral do PSdeG-PSOE en relación á difusión dun vídeo coa canción de campaña do Partido Popular titulada 'Galicia é moito'.

A Xunta Electoral de Galicia, á vista dos seguintes

Antecedentes

1. O 3 de marzo de 2020, o representante xeral do partido político PSdeG-PSOE presenta un escrito (RE 424/2020) no que formaliza unha denuncia contra o Partido Popular por infracción do artigo 50 da LOREX, pola difusión dun vídeo coa canción de campaña do Partido Popular titulada "Galicia é moito".

Polo que solicita que estes feitos sexan considerados unha infracción electoral e, consecuentemente, que se lle imponha unha sanción de 3.000€ e que se lle requira para que se absteña de realizar manifestacións públicas que incumpran o citado precepto.

2. Nesa mesma data trasladóuselle ao Partido Popular unha copia da denuncia para que puidesen formular alegacións.

3. O 4 de marzo de 2020, o Partido Popular, cumpre o trámite concedido formulando alegacións (RE 431 /2020) nas que solicita o arquivo da denuncia.

Fundamentos de dereito

Primeiro. O artigo 53 da Lei orgánica 5/85, do 19 de xuño, do Réxime Electoral Xeral (LOREX), establece o período de prohibición de campaña electoral sen prexuízo das actividades realizadas polos partidos, coalicións e federacións no exercicio das funcións constitucionalmente recoñecidas, e en particular no artigo 20 da Constitución. Artigo que debe traerse a colación para a resolución da denuncia presentada e non o artigo 50 no que fundamenta o seu *petitum* o representante do PSdeG-PSOE.

Segundo. A Instrución 3/2011, do 24 de marzo, da Xunta Electoral Central, sobre interpretación do artigo 53 da LOREX, en relación ao obxecto e aos límites das campañas en período electoral, reitera esta prohibición que concreta expresamente na prohibición de difusión de propaganda electoral entra a convocatoria e o inicio da campaña electoral e determina no seu apartado 2 os actos permitidos entre os que figura a realización e distribución en soportes electrónicos de vídeos nos que se dan a coñecer os candidatos ou o programa electoral.

Terceiro. A denuncia formulada cuestiona o uso reiterado do nome e logo da Xunta que entende deriva nunha confusión entre o Partido Popular e a Xunta de Galicia o que atenta, segundo o denunciante, contra o principio de neutralidade dos poderes públicos.

A Xunta electoral, unha vez visualizado o vídeo denunciado e vistas as alegacións formuladas polo Partido Popular, constata que no mesmo e en arredor de 24 ocasións, aparece unha bandeira coa



XUNTA ELECTORAL DE GALICIA



palabra *Xunta*, de tipografía coincidente coa empregada pola Institución. Bandeira que ondea en maquetas de obras ou de edificios públicos ao longo dos aproximadamente tres minutos de duración do vídeo.

A Xunta, tal e como se recolle no artigo 9 do Estatuto de Autonomía, constitúe unha das institucións autonómicas de Galicia polo que á luz dos acordos da XEC de 12 de maio de 2014 e 8 de novembro de 2016 nos que se recolle que non resulta admisible que as entidades políticas nos seus programas ou na súa publicidade electoral fagan unha utilización ou apropiación partidista das institucións do Estado, que pola súa natureza están por riba das diferentes opcións políticas e son patrimonio da Nación, Esta Xunta electoral non cuestiona a difusión por un partido político de logros ou actuacións levadas a cabo polo goberno autonómico, nin a difusión das imaxes do presidente da Xunta de Galicia e candidato do Partido Popular. O que se cuestiona é a apropiación dunha Institución galega, Xunta, nun vídeo de presentación do candidato do Partido Popular.

Cuarto. A Xunta Electoral de Galicia subliña a posible confusión implícita que nos electores puidera provocar a difusión do vídeo, entre a entidade política "Partido Popular" e a Institución autonómica "Xunta de Galicia". Máxime cando aínda non se ten iniciado a campaña electoral, o que fai que deban extremarse todas as cautelas para garantir e salvagardar os principios proclamados no artigo 8 da LOREX.

Acordo

Estimar parcialmente a denuncia e, polo tanto, ordenar a retirada ou modificación do vídeo "Galicia e Moito", coa supresión das bandeiras e emblemas referidos á Xunta de Galicia. Que en todo caso deberá realizarse á maior brevidade posible. Sen que proceda incoar expediente sancionador atendendo as circunstancias concorrentes e á a la documentación que obra neste expediente.

En execución do presente acordo, e para o cumprimento do disposto no art. 21.2 da Lei orgánica 5/85, do 19 de xuño, do Réxime Electoral Xeral, desenvolvido pola Instrución da Xunta Electoral Central 11/2007, do 27 de setembro, comunícolle que contra el poderá interpoñer recurso de alzada ante a Xunta Electoral Central, que deberá ser presentado ante esta Xunta Electoral de Galicia, para o seu informe, antes das 14 horas do próximo día 7 de marzo de 2020.

O recurso poderá presentarse por correo electrónico no seguinte enderezo: xunta.electoral.galicia@parlamentodegalicia.gal

A Coruña, 6 de marzo de 2020.

O presidente



José María Gómez y Díaz-Castroverde